

STJÓRNARTÍÐINDI B 99 – 2003

Nr. 649

2036

28. ágúst 2003

REGLUR

um úreldingu sauðfjársláturhúsa á árunum 2003 og 2004.

1. gr.

Markmið, ráðstöfunarfé o.fl.

Ríkissjóður greiðir bætur fyrir úreldingu sauðfjársláturhúsa á árunum 2003 og 2004 í þeim tilgangi að auka hagræðingu í rekstri sláturhúsa og lækka sláturkostnað.

Heimilt er að verja allt að 170 milljónum króna samtals á árunum 2003 og 2004 til greiðslu bóta fyrir úreldingu sauðfjársláturhúsa samkvæmt 1. mgr.

2. gr.

Fjárhæðir úreldingarbóta.

Bætur fyrir úreldingu einstakra sauðfjársláturhúsa geta að hámarki numið 65 kr. á hvert kg kindakjöts sem féll til við slátrun að meðaltali á ári í sláturhúsunum árin 2000-2002, þ.m.t. vegna heimtekens kindakjöts.

3. gr.

Rétthafar úreldingarbóta.

Rétthafar úreldingarbóta geta verið allir eigendur sauðfjársláturhúsa sem hlotið hafa lög-gildingu landbúnaðarráðherra og hafa verið nýtt til sauðfjárslátrunar árin 2000-2002, sbr. þó 2. mgr.

Réttur til úreldingarbóta samkvæmt 1. mgr. stofnast ekki nema greitt hafi verið útflutningsgjald samkvæmt 29. gr. laga nr. 99/1993 um framleiðslu, verðlagningu og sölu á búvörum með síðari breytingum af þeirri sauðfjárslátrun sem fram hefur farið í sláturhúsunum á árunum 2000-2002 og myndar grundvöll að útreikningi úreldingarbóta, sbr. 2. gr. Einnig er það skilyrði fyrir að réttur til úreldingarbóta stofnist að greiddar hafi verið allar skuldir við innleggjendur sauðfjárafurða vegna slátrunar í sláturhúsunum.

Eigendur sauðfjársláturhúsa geta þrátt fyrir ákvæði 2. mgr. óskað eftir úreldingu sláturhúsanna með því skilyrði að framkvæmdanefnd búvörusamninga ráðstafi úreldingarbótum eða hluta þeirra eftir því sem við á til að greiða upp þær skuldir sem tilgreindar eru í 2. mgr. í samræmi við ákvæði 10. gr.

4. gr.

Fasteignir sem úrelding nær til.

Úrelding nær til allra fasteigna sauðfjársláturhúss sem nýttar hafa verið til sauðfjárslátrunar á árunum 2000-2002. Um réttaráhrif úreldingar vísast til 11. gr.

5. gr.

Auglýsingar og umsóknir.

Framkvæmdanefnd búvörusamninga skal auglýsa eftir umsóknum um úreldingu sauðfjársláturhúsa eigi síðar en 5. september 2003. Umsóknarfrestir skulu vera sem hér segir:

- A. til 25. september 2003 ef úrelding tekur gildi 1. september 2003.
- B. til 31. desember 2003 ef úrelding tekur gildi 1. janúar 2004.
- C. til 31. desember 2003 ef úrelding tekur gildi 1. desember 2004.

Umsóknir skulu sendar framkvæmdanefnd búvörusamninga sem annast gerð samninga um úreldingu.

Í umsókn um úreldingu skulu koma fram upplýsingar um nafn, kennitölu, heimilisfang, símanúmer og netfang eiganda sláturhúss, fastanúmer fasteigna sem óskað er eftir að úrelða og matshlutanúmer ef við á, upplýsingar um ógreitt útflutningsgjald og afurðaverð, upplýsingar um kvaðir og önnur eignarhöft, svo og upplýsingar um bankareikning sem leggja má greiðslu bóta inn á. Einnig skal fylgja samþykki sameigenda ef þeir eru fyrir hendi, samþykki veðhafa, samþykki aðila sem njóta réttar í fasteignum sláturhúss á grundvelli samninga, kvaða eða annarra eignarhafta, staðfesting Bændasamtaka Íslands eða löggilts endurskoðanda á magni kindakjöts sem féll til í sláturhúsi á árunum 2000-2002 eftir því sem við á, staðfesting löggilts endurskoðanda á fjárhæðum skulda vegna ógreidds útflutningsgjalds og afurðaverðs svo og veðbókarvottorð sem ekki er eldra en viku gamalt þegar umsókn berst. Umsókn um úreldingu skal vera undirrituð af formanni stjórnar eða framkvæmdastjóra þegar um er að ræða lögaðila en eiganda sláturhúss ef hann er einstaklingur.

6. gr.

Forgangsröðun umsókna.

Móttöku umsókna skal staðfesta með dagstimpli. Berist umsóknir um úreldingu umfram þá fjármuni sem ætlaðir eru til ráðstöfunar skal forgangsraða umsóknum í þrjá flokka sem miðast við hvenær úrelding tekur gildi. Umsóknir um úreldingu sem tekur gildi 1. september 2003 skulu njóta forgangs á undan öllum öðrum umsóknum, næst á eftir koma umsóknir um úreldingu sem tekur gildi 1. janúar 2004 og síðast umsóknir um úreldingu sem tekur gildi 1. desember 2004. Innan hvers flokks skal skerðing vera hlutfallsleg miðað við fjárhæð úreldingarbóta.

7. gr.

Samningar um úreldingu.

Þegar tilskilin gögn liggja fyrir og umsókn um úreldingu hefur verið samþykkt gerir framkvæmdanefnd búvörusamninga samninga um úreldingu sláturhúsa við umsækjendur. Í samningi skal greina nafn, kennitölu, heimilisfang og fasteignir sem úrelding nær til ásamt fastanúmeri og matshlutanúmeri ef við á, fjárhæð og útreikning úreldingarbóta svo og bankareikning sem leggja má úreldingarbætur inn á. Einnig skal koma fram í samningi yfirlýsing um að eigandi sauðfjársláturhúss skuldbindi sig til að nota ekki til sauðfjárslátrunar fasteignir sem úrelding nær til og að um sé að ræða ótímabundna kvöð. Samningur um úreldingu skal vera undirritaður af stjórn eiganda sláturhúss eða af öðrum aðila sem stjórn hefur veitt umboð til þess ef um lögaðila er að ræða en af eiganda sláturhúss ef hann er einstaklingur. Þá skal samningur um úreldingu sláturhúss gerður með fyrirvara um samþykki landbúnaðarráðherra sem áritar samninginn. Samningurinn skal gerður í fjórum eintökum og skal eitt afhent sýslumanni til þinglýsingar en eigandi sláturhúss, framkvæmdanefnd búvörusamninga og landbúnaðarráðuneytið fá eitt eintak hver.

8. gr.

Þinglýsing.

Þinglýsa skal samningum um úreldingu sláturhúsa sem ótímabundinni kvöð á þær fasteignir sem úrelding nær til. Kostnað af þinglýsingu greiða eigendur sauðfjársláturhúsa. Óheimilt er að aflýsa samningum um úreldingu.

9. gr.

Greiðslur úreldingarbóta.

Framkvæmdanefnd búvörusamninga annast greiðslur úreldingarbóta þegar samningum um úreldingu hefur verið þinglýst, sbr. 8. gr. Ef úrelding tekur gildi 1. september 2003 skulu úreldingarbætur greiddar eigi síðar en 31. desember 2003. Ef úrelding tekur gildi 1. janúar 2004 skulu úreldingarbætur greiddar eigi síðar en 31. mars 2004. Ef úrelding tekur gildi 1. desember 2004 skulu úreldingarbætur greiddar eigi síðar en 31. desember 2004.

Óheimilt er að greiða eigendum sauðfjársláturhúsa úreldingarbætur samkvæmt 1. mgr. fyrir en skuldir samkvæmt 10. gr. hafa verið greiddar.

10. gr.

Uppgjör skulda.

Ef eigendur sauðfjársláturhúsa óska eftir úreldingu þrátt fyrir að ekki hafi verið greidd að fullu útflutningsgjöld samkvæmt 29. gr. laga nr. 99/1993 um framleiðslu, verðlagningu og sölu á búvörum með síðari breytingum af sauðfjárslátrun sem fram hefur farið í sláturhúsunum, sbr. 3. mgr. 3. gr. skal framkvæmdanefnd búvörusamninga fyrst ráðstafa úreldingarbótum eða hluta þeirra til að greiða slíkar skuldir áður en eftirstöðvar úreldingarbóta eru greiddar eigendum sláturhúsa, sbr. 3. mgr.

Ef eigendur sláturhúsa óska eftir úreldingu þrátt fyrir að ekki hafi verið greitt að fullu afurðaverð til bænda vegna sauðfjárslátrunar sem fram hefur farið í sláturhúsunum, sbr. 3. mgr. 3. gr. skal framkvæmdanefnd búvörusamninga ráðstafa úreldingarbótum eða hluta þeirra til að greiða slíkar skuldir þegar útflutningsgjöld samkvæmt 1. mgr. hafa verið greidd áður en eftirstöðvar úreldingarbóta eru greiddar eigendum sláturhúsa, sbr. 3. mgr. Ef úreldingarbætur vegna einstakra sauðfjársláturhúsa nema lægri fjárhæð en heildarskuldir eigenda þeirra sauðfjársláturhúsa samkvæmt þessari grein skal úreldingarbótum ráðstafað til greiðslu upp í allar skuldarnar í sama hlutfalli.

Þegar skuldir samkvæmt 1.-2. mgr. hafa verið greiddar greiðir framkvæmdanefnd búvörusamninga eftirstöðvar úreldingarbóta ef einhverjar eru til eigenda sauðfjársláturhúsa.

11. gr.

Réttaráhrif úreldingar.

Fasteignir sauðfjársláturhúsa sem úrelding nær til er óheimilt að nota til sauðfjárslátrunar eftir að úrelding hefur farið fram og gildir þessi kvöð í ótakmarkaðan tíma. Ekki eru aðrar takmarkanir á notkun fasteignanna.

12. gr.

Gildistaka.

Reglur þessar öðlast þegar gildi.

Landbúnaðarráðuneytinu, 28. ágúst 2003.

F. h. r.

Guðmundur B. Helgason.

Sigríður Norðmann.